

Fita ena leta nugweta

Leta ana alamani weaqina

Ba'e Fita ena 'wayavi 'inega ve'iteda Iesu tauna ena ilivu qabuna aqiaqina, ta tua bwa'obwa'oya toa vitana lobe. Ta Fita ena leta ba'e 'wayavia enavo 'idia mali di'we be mali di'we 'inaya ivewagawaga itoatoa, mana taudi wese toa vitana ilobelobe. Ta vetumaqana weaqina. 'Inega nuanuana nagivewaiwaiedi ena 'wayaviega, e 'inega voned Iesu Valena Aqiaqina ge ina nuafania, mana Vale~nana 'inega adi fata ina lu'ita vane tuta maimai weaqina, mana omo'e tuta~nana 'inaya toa aqiaqina Iesu ena 'aliga be ena ya'itoto 'evivi 'inega ina lobe. Ta 'eguma ba'e yani diavona aqiaqi otaqina ina nuave'avinidi 'inega adi fata toa vitana be vevoalana 'idiega ina tovoloi'ita. Ta 'abibodanaya Iesu ena 'aubena qiduana 'inaya nave'ia aqiaqiedi.

Ta wese Fita ba'e leta~nana ana to'ewayavo vona waiwaina neidi be ina veilivu aqiaqi mana taudi Keliso ena tomotauyavo.

Leta gamona

1:1-2 Vematamagilafu be venoqi
1:3-12 'Ebeqaiawa qiduana tovetumaqana weaqidi
1:13-2:10 Toa vunavunaqina be gwalagwalana weaqina
2:11-4:19 To'ekalesia adi veyoveyoa tuta vitana 'idia
5:1-11 Vanugweta be ilivu nuvana weaqina
5:12-14 Vona veyoluba

Lukaiwa

1 ¹Ya'a Fita Iesu Keliso ena tovaletuyana.
Ba'e egu leta 'imia, omi'a Yaubada ena tomotauyavo ovewagawaga di'we taha taha 'idia 'idewani Fonito be, Galetia be, Kafadosia be, Eisia ta wese Bitania 'idia. ² ^a Omi'a lova Tamada Yaubada venua'ivinemi ena tomotauyavo 'idewani, ta Niboana Gwalagwalana 'inega ni'a givevunavunaqimi Natuna sulalinega, ta Iesu Keliso ena vona ni'a omatamatayagea.

^a 1:2 Lom 8:29; 2Te 2:13

Nuanuagu Yaubada ena veyoluba be wese ena nuadaumwala naveqidua va'ine 'imia.

Kana lu'ita vane 'etoyavua weaqina

3-4^b Eda Kaiwabu Ieisu Keliso Tamana Yaubada kana awatuboya, mana ena nuakolokolo qiduana 'inega ni'a kavi'oi 'evivi, ta wese 'ebelū'ita vane mayawaina neida, mana Ieisu Keliso 'aligega giveya'itoto 'eviviea. Ta mahala 'inaya Yaubada taha yani aqiaqi otaqina ta vunavunaqina a'uveaqea omi'a weaqimi, ta ba'e yani nana ana maisa ge kana vona, ta ge ana fata nadavula nage naluveifa ta ge wese nahawala. 5^c Ta Yaubada ena waiwaiega na'itamakimi ana laba 'etoyavua ona lobeia, mana omi'a ovevetumaqanea. Ba'e 'etoyavua~nana nagive'ifoqeyea tuta 'ebelū'ovoa 'inaya tomotau qabuda matadaya.

6^d 'Inega ba'e weaqina ona qaiawa qiduana, mana ba'idia bwa'obwa'oya tuta kukusana namo 'ebesitonova vitadi olobelobedi, ta nawale gebu. 7^e Ba'e vita diavona 'idiega emi vetumaqana Ieisu 'inaya weaqina Yaubada nasitonovimi be vetumaqana~nana ana waiwai na'itea, kavona dabo goulda 'aiwe 'ala'alainega igabugabu tonovidi. Ta omi'a emi vetumaqana yani qiduana Yaubada matanaya, mana goulda yani awahawalina. Ta 'eguma emi vetumaqana nawale waiwaina 'eno'eno 'ebesitonova diavona 'abibodanaya, e 'inega tuta~nana Yaubada Ieisu Keliso nagive'ifoqeyea tomotau qabudi matadia 'inega awatubo be 'amayaba naneimi ta wese ena simatala aqiaqi otaqina ona 'itea. 8^f Keliso~nana ge taha tuta oda 'itei ta tua nawale oveveyolubea, ta ba'itagana wese ge oda 'itei ta tua ovevetumaqanea. Ta emi qaiawa qiduana weaqina ge kana vona, 9^g mana emi vetumaqana ana ve'ia 'inega 'etoyavua ona lobeia.

10^g Lova Yaubada 'etoyavua~nana 'iva'ava'aia weaqimi, ta ena tovesimasimana ivona fofofolayea 'imia. Ta taudi yani qabuna 'etoyavua~nana weaqina ge ida alamania, 'inega taudiega isali aqiaqiea. 11^h Ta Keliso Niboanina ni'a maduvonedi Ieisu ena veilae weaqina ta wese tola'ai aqiaqi otaqina na'ifoqe 'abibodanaya. Ta taudi inuanua qiduana vona~nana ana alamani weaqina, ta wese toyani aqiaqi otaqina na'ifoqe veilae~nana 'abibodanaya. 'Inega inuanua totuta 'inaya be, ma'oda 'inega ta wese togama 'inega 'etoyavua~nana na'ifoqe. 12ⁱ Ta Yaubada tovesimasimana diavona ve'itedi ba'e yani~nana ge na'ifoqe taudi edi tutaya, ta 'esi 'abibodadia omi'a emi tutaya. Yani~nana lova ivonayea ni'a onoqolidi Vale Aqiaqina ana tolugaihiavo 'idiega. Ta taudi Vale~nana ilugaihia Niboana Gwalagwalana ena waiwaiega mahalega.

^b 1:3-4 Kol 1:12 ^c 1:5 Ion 10:28; 17:11 ^d 1:6 1Fit 5:10; Iem 1:2 ^e 1:7 Vos 17:3; Sek 13:9; Mal 3:3; Iem 1:3 ^f 1:8 Ion 20:29; 2Kol 5:7 ^g 1:10 Md 13:16-17 ^h 1:11 Same 22; Ais 53; Lk 24:26-27

Ta yani diavona aqiaqidi weaqidi ni'a isimana 'imia e wese Yaubada ena tovale'ewayavo nuanuadi ina alamani aqiaqiea.

Ilivu vunavunaqina

¹³ Inega ba'e yani diavona weaqina emi nuanua ona 'iva'ava'aidi ta wese omi'a ma emiavo ona 'itamaki aqiaqiem. Ta ona lu'ita vane ami 'etoyavua Yaubada 'inega weaqina, mana ba'e 'etoyavua~nana naneimi tuta~nana Ieisu Keliso nagive'ifoqeyea. ¹⁴ ⁱ Omi'a Yaubada ona vematamatayagea. Lova nuami ge da'eqa'ui Yaubada ena nuanua weaqina ta 'esi mwagemwagem, e 'inega ilivu luveifana oviaqidi. 'Inegana ba'itaga ge wese ona 'evivi ilivu luveifa diavona 'idia. ¹⁵ Ta 'esi yani qabuna oviaviaqidi, e ilivu gwalagwalana 'inega ona viaqidi, 'idewani ami Togaba Yaubada ena ilivu gwalagwalana. ¹⁶ ^j Mana Buki Nugwenugweina 'inaya vonaya, "Ona vegwalemi mana ya'a gwalagwalagu."

¹⁷ ^k Ta ge ona nuafania Yaubada ena luvine 'aidegana ta tunutunuqina 'inega tomotau qabuda naluvineda. Eda viaqayavo 'idiega nawale Yaubada ena luvine 'inega naluvineda nage aqiaqida nage luveifada. Tauna Yaubada~nana tuta qabuna ogabea Tamami emi venoqi 'inaya, e 'inega luaqiaqiem be ona 'amayabea tuta qabuna bwa'obwa'o ba'e 'inaya, mana omi'a otoatoa wagawaga 'idewana. ¹⁸ Lova omi'a tubumiavo 'idiega ilivu ge aqiaqina o'ewea. Ta ni'a oalamanian Yaubada gubaufemi ilivu luveifanega be 'etoyavuimi. Ta ge taha yani awahawalidi 'idewani mwali nage bagi 'idiega dagubaufemi. ¹⁹ ^l Ta 'esi Yaubada gubaufemi Keliso sulalina aqiaqinega. Mana Keliso~nana kavonaya sifi natudi lami ana 'ita aqiaqi otaqina, ge taha ena luveifamo. ²⁰ ^m 'Inega Yaubada Keliso maduvenua'ivinea ena fewa ba'e weaqina, ta 'abiboda bwa'obwa'o 'iva'ava'aia. Ta ba'itagana tuta ana 'ebeluo'ova 'inaya Keliso mai ita'a weaqida. ²¹ ⁿ Ta Keliso~nana 'inega Yaubada ovetumaqanea, mana tauna giveya'itoto 'eviviea 'aligega, ta ana galiva kaikaiwabuna ta simasimalatina 'inaya a'uya. 'Inega ami fata be emi vetumaqana be wese emi lu'ita vane me emi alamani aqiaqi ona a'udi Yaubada 'inaya.

²² ^o Omi'a Vale Aqiaqina ena vonahaqiaqi ovelumatamatayagea, ta matayaga~nana 'inega ni'a ovevunavunaqa emi ilivu luveifana 'idiega, ta ba'e 'inega ami fata emiavo tovetumaqana oveveyoluba aqiaqiedi. Ta 'inega luaqiaqiem be giwalimiega taumiega 'aidega 'aidega ona veyolubemi. ²³ Omi'a ni'a ovi'oi 'evivi, ta ge bwa'obwa'o ana tomotau awahawalidi 'idiega, ta 'esi Tamada ena vona mayawaina 'eno'eno

ⁱ 1:14 Lom 12:2; Efe 2:3; 4:17-18 ^j 1:16 Luvi 11:44-45; Md 5:48 ^k 1:17 Lom 2:11; Ve 2:23

^l 1:19 Via 20:28; Ibe 9:12-14 ^m 1:20 2Tim 1:9-10; Efe 1:4 ⁿ 1:21 Ion 14:6; Lom 5:1-2

^o 1:22 Ion 13:34; Lom 12:10

vatayana 'inega. Ta Tamada Yaubada ge ana fata na'aliga. ^{24p} 'Idewani Buki Nugwenugweina ena simana vonaya,

“Tomotau qabudi 'idewani libi,
ta adi 'ita aqiaqi otaqina
kavona libi ididi.

Ta libi diavona nawale
ina 'aliga ta wese ididina
ina mwatuqu ta ina avuta.

25 Ta 'esi Kaiwabu ena vona
'eno'eno vatayana.”

Ta Vona~nana ni'a onoqolia Vale Aqiaqina ana tolugaihi 'idiega.

2 ^{1q} 'Inega emi luveifanayavo 'idewani 'eu'au'ava be, givemwaniniva be, vonavane be, ve'ifi'ifi be, vetalafululu ta wese ilivu luveifadi qabudi ona nogedi. ² Ta 'esi luaqiaqiemi niboanini ana susu aqiaqina ona salia emi nuanua qabuna 'inega kavonaya be gogama dilidilidi susu weaqina idoudou, ta ba'e susu~nana 'inega niboanini ina tabo ta ona vewaiwai ami 'etoyavua weaqina. ^{3r} Vonahaqiaqi, eda Kaiwabu ena nuakolokolo ni'au olutonovia.

'Oqola mayawaina

⁴ 'Inega ona mai Keliso 'inaya, tauna 'oqola mayawaina. Totoa bwa'obwa'o inogea, ta Yaubada 'inaya ba'e 'oqola~nana yani aqiaqi otaqina, 'inega venua'ivinea. ^{5s} Omi'a ba'itagana Yaubada vefewemi kavona 'oqola mayawaidi 'idewani, ta omi'a 'imiega ena vanue gwalagwalana yoqoyoqonia Niboanina 'inega. E 'inega omi'a kavona toveguba gwalagwalami, be ona veguba Yaubada 'inaya Niboanina ena nuanua 'inega. Ta ba'e viaqa~nana 'inega Yaubada emi gubayavo na'awahaqiaqiedi Iesu Keliso 'inega. ^{6t} 'Idewani Buki Nugwenugweina 'inaya vonaya,

“O'itea 'oqola ba'e aqiaqina
ta vevenua'ivinina
yaha'unugwetea vanue ana yoqona weaqina
'abaga Ielusalema 'inaya,
ta tomeqabu ivetumaqana 'inaya
ge wese ina iniyauiyau.”

^{7u} Ta omi'a ba'e 'oqola~nana ni'au ovetumaqanea, 'inega ve'ebeiuila qiduana weaqimi. Ta tomeqabu 'oqola ba'e 'inaya ge ida vetumaqana Buki Nugwenugweina weaqidi simana vonaya,

“Lova 'oqola~nana vanue ana to'eyoqona inogea,

^p 1:24-25 Ais 40:6-8 ^q 2:1 Efe 4:22; Iem 1:21 ^r 2:3 Same 34:8 ^s 2:5 Efe 2:21-22; Ve 1:6
^t 2:6 Ais 28:16; Efe 2:20 ^u 2:7 Same 118:22

ta ba'itagana Yaubada 'oqola~nana
ni'au vetovolo nugwetea.”

8^v Ta wese vonaya,

“Oqola ba'e 'inaya tomotau
'aqedi ina vetufea ina be'u.”

Ta edi be'u 'iuna mana ge nuanuadi Vale Aqiaqina ina 'abibodei. 'Inega
lova Yaubada ena nuanua 'inega luvine a'uya vonigo ba'e yani~nana
na'ifoqe 'idia.

Yaubada ena tomotau vevenua'ivinidi

9^w Ta 'esi omi'a gebu taudi 'idewani, mana omi'a Yaubada ena qabu
vevenua'ivini, 'inega omi'a Toluvine Qiduana ena tovegubayavo ta
ena tomotauyavo gwalagwalami. 'Inega luaqiaqiem be Yaubada ena
nuakolokolo qiduana weaqina ona simanea tomotau 'idia, mana di'we
velovelovana 'inega gabemi ta 'ewa 'ifoqeyemi ta ena simatala aqiaqi
otaqina 'inaya a'umi. 10^x Vonahaqiaqi, lova omi'a ge oda toatoa Yaubada
ena tomotauyavo 'idewani, ta ba'itagana omi'a ena tomotauyavo. Ta wese
lova Yaubada ena nuakolokolo ge oda lobei, ta ba'itagana ni'au o'ewea.

11^y Egwavo, omi'a 'idewani wagawaga bwa'obwa'o ba'e 'inaya otoatoa.
Ta ba'e egu vona waiwaina 'imia: Emi nuanua luveifadi giwalimiega
ona nogedi, mana nuanua luveifadi niboanimi iveveaviedi. 12^z Omi'a
taudi ge ida vetumaqana maega otoatoa, ta luaqiaqiem be emi ilivu
ta wese emi toa nuanidia weaqina taumiega ona 'itamaki aqiaqiem.
Taudi iveve'ewemi ta ivonaya vonigo omi'a emi viaqayavo ge aqiaqidi, ta
'esi tuta~nana emi viaqayavo aqiaqi otaqidi ina 'itedi e 'inega 'abiboda
Yaubada ina awatuboya tuta~nana na'evivi namai bwa'obwa'oya tomotau
sabi luvineda.

Toluvineavo be kaiwabuyavo kana 'amayabedi

13^a Omi'a luaqiaqiem be toluvineavo ta wese tovanugwetayavo qabudi
bwa'obwa'oya ona velumatamatayagedi. 'Inega kini ena luvine ona
'abibodea, mana ba'e eda Kaiwabu ena nuanua. 14^b Ta wese toluvineavo
'idewana gavana ona 'abibodedi, mana kini~nana gavana~dina
venua'ivinedi be yaqisa taudi toluveifadi ina luvematasabudi ta
tomotau aqiaqidi awatubo ina lobeia gavana diavona 'idiega. 15^b
Yaubada nuanuana omi'a taudi tovemwage edi 'awaluveifa weaqimi ona
givelua'udi emi viaqayavo aqiaqidi 'idiega. Mana nuanuadi ina ve'ewemi,
ta ge wese adi fata 'eguma tuta qabuna ilivu aqiaqidi oviaviaqidi. 16^a Ta
omi'a ni'a Yaubada yavuimi, 'inega taumi ona luvinemi ta ge ilivu

^v 2:8 Ais 8:14 ^w 2:9 Luve 7:6; 14:2; Ais 9:2; Tai 2:14; Via 26:18; Efe 5:8 ^x 2:10 Ose 2:23
^y 2:11 Gal 5:17,24 ^z 2:12 Md 5:16 ^a 2:13 Tai 3:1 ^b 2:15 1Fit 3:16

luveifadi 'idia ona awafelemi. Ta 'esi ona fewa 'idewani omi'a Yaubada ena tofewa kavovoyavo. ^{17c} 'Inega tomotau qabudi ona 'amayabedi, ta emiavo me edi vetumaqana ona veyolubedi. Ta wese Yaubada ona 'amayabea ta ona mwaninivea, mana tauna 'iva'ava'aida. Ta wese kini ona 'amayabea.

^{18d} Ta omi'a tofewa kavovo, emi kaiwabuyavo ona 'amayabedi be edi luvine tuta qabuna ona 'abibodea. Tola'ai ina vonemi e ona viaqia. Ta ge kaiwabuyavo aqiaqidi adi 'aidega ona 'abibodedi, ta wese taudi kaiwabuyavo luveifadi edi luvine ona vematamatayagea. ¹⁹ Mana 'eguma fewa aqiaqina oviaviaqia ta tua ina veilivu veifemi 'inega Yaubada ona vetumaqanea qiduana ta ona bibitaqomi, mana ba'e yani qiduana matanaya. ^{20e} Vonahaqiaqi, 'eguma emi viaqa luveifana 'inega ina vunuwimi be ona bibitaqomi, e bena'e ge yani agona Yaubada matanaya, mana veilage~nana ami luaqiaqi. Ta 'esi 'eguma emi ilivu aqiaqina 'inega ina vunuwimi be ona bibitaqomi, e 'inega Yaubada naqaiawa weaqimi. ^{21f} Yaubada ni'au gabemi ilivu ba'e ona 'abibodea, mana Keliso weaqida visiqi qiduana lutonovia, ta ba'e 'inega ve'ebe'ita weaqimi, e 'inega yaenega ona tauya.

^{22g} "Tauna ge taha ena luveifamo

ta wese ge taha u'ava 'awanega da'ifoqe."

^{23h} Ta tuta~nana tomotau Keliso i'awaluveifea 'inega ge wese dave'iedi. Ta wese tuta~nana ivunuqia ge diana davilei 'idia, ta 'esi Yaubada vetumaqana aqiaqiea, mana tauna ena luvine tunutunuqina. ²⁴ⁱ Vonahaqiaqi, Keliso ana 'aidega ma 'wafina eda luveifana 'avalea 'etoluai 'inaya, e omo'e 'inega eda luveifana qabuna luveawalidi, be yaqisa ada fata ilivu tunutunuqina 'inega kana tauya. Ta ana 'abia 'awa'ivina 'inega ni'au giveaqiaqieda. ^{25j} Vonahaqiaqi, lova omi'a 'idewana sifi luluve'waivimi, ta ba'itagana To'itamaki Sifi be 'Ekalesia ana Toludebana ni'a 'ewa 'eviviemi 'inaya. Tauna yawaimi qabuna ana To'itamaki.

Vaqivaqidi adi luvine

3 ^{1-2k} Ta wese 'idewani omi'a vivine vaqivaqimi moqanemiavo ona 'amayabedi ta ona matayagedi. Ta 'eguma moqanemiavo Yaubada ena vona ge ida vetumaqanea, 'inega omi'a emi ilivu tunutunuqina ta simasimalatalina ona ve'itedi. 'Inega emi ilivu aqiaqidi 'idiega ina nuagivila ta Yaubada ina vetumaqanea. ^{3l} Omi'a vivine 'wafimi adi 'ebeve'ivala 'idewani debami ana amo nage bagi viaviaqina goulia, nage kaleko adi 'ita aqiaqina ge yani qiduana, ⁴ ta 'esi omi'a giwalimi ona ve'ivalidi 'ivala

^c 2:17 Lom 12:10 ^d 2:18 Efe 6:5 ^e 2:20 1Fit 3:14,17 ^f 2:21 Md 16:24; Ion 13:15

^g 2:22 Ais 53:9 ^h 2:23 Ais 53:7; 1Fit 3:9 ⁱ 2:24 Lom 6:11; Ais 53:5-6 ^j 2:25 Isi 34:5-6; Md 9:36; Ion 10:14; Ibe 13:20-21 ^k 3:1-2 Efe 5:22 ^l 3:3 1Tim 2:9

'eno'eno vatayadi 'idiega, ta ona alamania ba'e yani qiduana Yaubada matanaya. ⁵E ba'e 'idewana lova vivine totafwalolo taudi Yaubada ivetumaqanea giwalidi ive'ivalia ilivu nuvana be nuawebui 'idiega, ta wese moqanediavo i'amayabedi be imatayagedi. ⁶^m Wese 'idewana Sela moqanedi Ebelamo ena vona imatayagea ta i'awakaiwabuyea. Ta 'eguma omi'a emi ilivu aqiaqina ta ge taha yani weaqina ona mwaniniva, e 'inega omi'a Sela natudiavo.

⁷ⁿ Ta wese 'idewani, omi'a 'oloto vaqivaqimi moqanemiavo maega otoatoa ona nuanua weaqidi, mana taudi edi waiwai be edi nuanua ge omi'a 'oloto 'idewani. 'Inega luaqiaqiemi be ona 'amayabedi ta ona 'itamakidi, mana omi'a be moqanemiavo maega yawaimi 'aidegana Yaubada ena veyolubega neimi. Ta vonahaqiaqi, 'eguma moqanemiavo ona veilivu aqiaqiedi omo'e 'idewani, e 'inega Yaubada emi venoqi wese nanoqolidi.

Vita kana lobeia viaqa aqiaqina 'inega

⁸Egu ve'ita ba'e ni'a onoqolia, 'inega nuanuagu omi'a qabumi emi nuanua 'aideganega ona toatoa, ta 'eguma taha toga 'imiega naveilaqe nage vita nalobeia, e 'inega qabumi ona nuakolokoloyea. Ta me emi nuawebui ta wese ilivu nuvana 'inega ma emiavo taumiega ona veyolubemi. ⁹Eguma tomotau vaina ina veilivu veifemi 'inega ge ona ve'iedi. Ta wese 'eguma vaina ina vona veifemi ge wese ona ve'iedi, ta 'esi omi'a ona vona veyolubedi vona aqiaqina 'inega. Ba'e Yaubada ena nuanua 'idewana, 'inega nawale ami veyoluba ona 'ewea tauna 'inega, ¹⁰^o mana 'idewana Buki Nugwenugweina ena simana vonaya,

“Eguma taha toga nuanuana be
naqaiawa 'aubena qabuna 'idia,
e 'inega luaqiaqiea be
vona kavokavovo be 'eu'au'ava nalua'udi.

¹¹ Tauna ena ilivu luveifadi nanogedi
ta 'esi viaqa aqiaqidi naviaqidi tomotau 'idia.

Ta wese navetafe'wa waiwai
toadaumwala weaqina tomotau qabudi maega.

¹² Mana eda Kaiwabu tuta qabuna
tunutunuqidi 'ita'itamakidi,
ta wese edi noqi noqonoqolia,
ta taudi luveluveifadi nogenogedi.”

¹³ Togama ana fata be nagiveluveifemi 'eguma omi'a yani aqiaqina nuanuami ona viaqidi? ¹⁴^p Ta tua nage tomotau ina veilaqeyemi emi ilivu

^m 3:6 Nug 18:12 ⁿ 3:7 Efe 5:25 ^o 3:10-12 Same 34:12-16 ^p 3:14 Ais 8:12-13; Md 5:10;
1Fit 2:20; 4:14

aqiaqidi weaqina, e 'inega ona qaiawa ta ge ona mwaniniva weaqidi. ¹⁵Ta 'esi Keliso ona awatuboya, tauna yawaimi ana Kaiwabu 'idewana. Ta tuta qabuna me emi 'iva'ava'ata ona toatoa, mana 'eguma taha toga namai navetala'aiemi emi lu'ita vane 'iuna weaqina, e 'inega emi ilivu nuvana 'inega lu'ita vane~nana ona givesimatalia 'inaya. ¹⁶^q Ge taha yani luveifana ona viaqi, be yaqisa ami fata tuta qabuna ma ami lutonova aqiaqina Yaubada matanaya ona tovotovololo. Ta 'eguma tomotau ina 'awaluveifemi mana omi'a Keliso ana to'abibodayavo, e 'inega nawale ina iniyauyau edi 'awaluveifa~nana weaqina. ¹⁷Eguma Yaubada nahawafelemi luvematasabu 'inaya emi viaqa aqiaqina 'idiega, e 'inega yani aqiaqina weaqimi, ta 'esi 'eguma luvematasabu~nana ona lobeia viaqa veifana 'idiega e 'inega ge taha ana aqiaqimo Yaubada matanaya, mana luvematasabu~nana taumiega osalisali.

¹⁸Ta ona nuaia Keliso weaqina, tauna ge taha ena luveifamo, ta eda luveifana weaqina 'aliga tuta 'aidegana 'inaya, ta ge wese na'aliga 'evivi. E omo'e 'inega 'ebe'eweda Yaubada 'inaya. Keliso 'wafina iluve'aligia ta Tamana giveyawaha 'eviviea Niboanina 'inega. ¹⁹Ta Keliso Niboanina 'inega tauya niboana yoqoyoqonidi edi 'ebetoe 'inaya ta lugaihi 'idia, ²⁰^r mana taudi lova Yaubada ena vona ge ida vetumaqanea. Tuta~nana Noa waga viaviaqia 'inega Yaubada me ena bibitaqo tomotau ba'eba'eyedi vonigo ida nuagivila, ta gebu. 'Inega qabudi seuseu 'inaya igavivila ta tomotau adi yau 'eita (8) dimo seuseu~nana 'inega Yaubada 'etoyavuidi. ²¹Go'ila ba'ena ve'ebe'ita babitaiso weaqina, mana babitaiso 'inega Yaubada 'etoyavuida. Ta babitaiso~nana ge dave'ebe'ita 'wafida ana 'utu weaqina, ta 'esi ana alamani ba'e: Ada fata Yaubada matanaya kana tovotovololo ma ada lutonova aqiaqina ta kana venoqiea iula weaqina, mana giwalida vunavunaqina. Ta ba'e babitaiso~nana na'etoyavuimi Ieisu Keliso ena ya'itoto 'aligega ana waiwai 'inega. ²²Keliso ni'a vaneqa mahalaya ta ba'itagana Yaubada 'ataqinaya toatoa, ta Tamana ena tovale'ewayavo be toluvineavo ta wese yani qabuna waiwaidi Keliso ivelumamatayagea.

Yaubada weaqina kana veillivu aqiaqi

4 ¹^s Vonahaqiaqi, Keliso 'wafinega visiq a lobeia, 'inegana omi'a wese emi nuanua ona givewaiwaiedi kavonaya Ieisu, ta ona 'iva'ava'aimi visiq a weaqina. Mana 'eguma 'wafimi ona awafelea visiq a 'inaya 'idewana Keliso, e 'inega emi luveifana ni'au onogea. ²Inega tuta qabuna bwa'obwa'oya katoatoa kana awafeleda Yaubada 'inaya, ta ena nuanua kana viaqia ta ge wese tauda eda nuagovaqa luveifadi kana 'abibodedi. ³^t Lova emi ilivu kavonea taudi velovelovana ana totoayavo

^q 3:16 1Fit 2:12 ^r 3:20 Nug 6:1–7:24 ^s 4:1 Lom 6:2,7 ^t 4:3 Efe 2:2-3

edi ilivu 'idewani velamo'eno kavokavovo be, nuanua 'wai'waivina be, go'ila waiwaina ana numa be, veiaiana luveifana be, veilivu kavokavovo ana viaqayavo, ta wese iwa'odu tokwalui 'idia. ⁴ Ta ba'itagana ba'e ilivu luveifa diavona ni'au onogedi, 'inega vaina emiavo oveyaulovodi, mana omi'a ge wese nuanuami yani luveifana taudi maega ona viaqidi kavona lova 'idewani, e 'inega i'awa'awa luveifemi. ⁵ Ta ona nuaia nawale tomotau mayawaidi be wese 'ali'aligidi ina tovolu Yaubada matanaya ta edi ilivuyavo ina simana 'ifoqeyedi, 'inega naluvinedi edi viaqa diavona weaqidi. ⁶ Ba'e iuna 'inega to'aliga Vale Aqiaqina inoqolia lugaihi 'inega. Mana taudi lova tuta~nana nawale ma 'wafidi itoatoa e 'aliga ana luvine ilobea tomotau qabuda 'idewani. Ta lugaihi~nana 'inega adi fata niboanidi 'inega ina toatoa 'idewani Yaubada toatoa.

⁷ Vonahaqiaqi, tuta 'ebeluvoo ni'a vadi'wedi'weda, 'inega omi'a ona nuanua aqiaqi ta emi ilivu taumi ona 'itamakia be yaqisa ami fata ona venoqi Yaubada 'inaya. ⁸ Taha ilivu ona alamani aqiaqiea mana ba'e ilivu~nana ilivu qabudi veqidua va'inedi, e ba'e: Luaqiaqiemi be ona veyoluba aqiaqiemi emiavo maega, mana veyoluba ilivuna ana fata luveifana qabuna na'ewa yavuledi. ⁹ Ta wese tomotau ona gaba 'uma'umaiemi emi vanuea, ta ge me emi lumugi. ¹⁰ Yaubada ena nei kavovo 'inega ami wila'a 'aidega 'aidega ni'a neimi, 'inega wila'a diavona ona vefewedi be emiavo ona iuledi, 'inega emi viaqayavo 'idiega Yaubada ena nuakolokolo ona ve'itayea 'idia. ¹¹ Eguma taha toga Yaubada ena wila'a 'inega navetolugaihi, e 'inega tauna Yaubada ena vona nalugaihi aqiaqiea tomotau 'idia. Ta wese 'eguma taha toga navetoiula Yaubada ena wila'a 'inega, e 'inega tauna tomotau naiula aqiaqiedi Yaubada ena waiwaiega. 'Inega emi fewa qabuna 'idiega Yaubada ina awatuboya Ieisu Keliso ana wawega. Ta luaqiaqieda be tuta vataya 'inaya kana awahawatuboya, mana tauna ena waiwai ge wese nahawala. Vonahaqiaqi eda nuanua 'idewani.

Isu ana to'abibodayavo ina veilae

¹² Egwavo ye, ba'itagana 'ebesitonova vitavitadi be wese veilae taha taha olobelobedi. Ta ge ona vonaya, "Tola'ai weaqina ba'e yani diavona i'ifo'ifoqe 'idaya? Ge taha toga davonema!" Vonahaqiaqi, ba'e vita diavona weaqidi ge ona nuavoqana, mana ita'a tovetumaqana ada luvine 'idewani, be vita diavona kana lobedi. ¹³ Mana Ieisu Keliso veilae lobe 'idewani omi'a wese veilae olobelobe, be yaqisa ona qaiawa qiduana tuta~nana na'evivi namai me ena simatala aqiaqi otaqina be wese me ena luvine waiwaina. ¹⁴ Ta 'eguma tomotau ina 'awaluveifemi

^u 4:5 Via 10:42 ^v 4:7 Lom 13:11-12 ^w 4:8 1Fit 1:22 ^x 4:9 Ibe 13:2

^y 4:10-11 Lom 12:6-8 ^z 4:13 Via 5:41; Iem 1:2; 1Fit 1:6-7 ^a 4:14 1Fit 2:20

emi vetumaqana Keliso weaqina, tua ta ona qaiawa, mana Yaubada Niboanina simasimalatina 'imia toatoa. ¹⁵ Ta omi'a ge daluaqiaqiemi 'eguma luvematasabu ona lobe a yani luveifana adi viaqa 'idiega 'idewana luve'aliga be, vanawala be, vedavi ta wese 'eguma tomtau ona ve'wafi siniaqiaqiedi. ¹⁶ Ta 'esi luaqiaqiemi 'eguma luvematasabu ona lobe a mana omi'a tovetumaqana, 'inega ge ona iniauyau emi vetumaqana weaqina, ta 'esi Yaubada ona awatuboya mana omi'a Keliso ena tomtauyavo.

¹⁷ Vetala'ai ana tuta ni'a vadi'wedi'weda, ta Yaubada ena tomtauyavo namaduvetala'aiedi. Ta 'abiboda taudi Vale Aqiaqina ge ida velumatamatayagea edi luveifana ana ve'ia vita otaqina ina lobe a. ^{18 b} Ta Buki Nugwenugweina 'inaya simana vonaya,

“Eguma 'etoyavua ana loba tufwana vitana taudi aqiaqidi 'idia,
 'inega ma'oda na'ifoqe 'aiqa taudi luveluveifadi
 be ge tunutunuqidi 'idia?

Vonahaqiaqi, ge adi fata 'etoyavua ina lobe i.”

¹⁹ Inega omi'a 'eguma Yaubada ena nuanua 'inega luvematasabu ona lobe a, 'inega ona awafelemi ami To'iva'ava'ata 'inaya, mana tauna ma ana vetumaqana, 'inega na'itamaki aqiaqiemi. Ta fewa aqiaqidi ba'itagana oviaqiaqidi wese tuta qabuna 'idia ona viaqiaqidi.

Yaubada ena tomtauyavo adi 'itamaki

5 ¹ Omi'a 'ekalesia ana tovanugwetayavo ba'e ami vematamagilafu 'iguyega emi fewa weaqina. Ya'a wese taha 'ekalesia ana tovanugweta, ta mataguyega Keliso ena veilae ya'itea. Ta nawale tuta maimai 'inaya Yaubada yani qabuna aqiaqi otaqina Keliso 'inaya 'eno'eno nage'ifoqeyea, 'inega omo'e tuta~nana 'inaya ya'a wese aqiaqi~nana 'inaya ena toa. ^{2 c} Yaubada ena tomtauyavo qabudi neimi ta ona vanugweta aqiaqiedi kavonaya be taudi 'idewani sifi ta omi'a adi to'itamaki, mana Yaubada ena nuanua 'idewani. Ta ge ona vegwavu'ai, ta 'esi me emi nuanua aqiaqina ona vanugwetedi. Ta wese ge ona nuanua ve'ia weaqina, ta 'esi ona awafela aqiaqiemi fewa~nana 'inaya, mana omi'a Yaubada weaqina ofewafewa. ^{3 d} Ta gebu luvine waiwaina 'inega ona vanugwetedi vadi kaiwabu edi vanugweta 'idewani, ta 'esi omi'a luaqiaqiemi be ilivu aqiaqina ona ve'itedi 'inega ina 'abibodemi. ⁴ Ta tuta~nana sifi adi To'itamaki Qiduana na'ifoqe namai, e 'inega ami ve'ia aqiaqi otaqina 'eno'eno vatayana tauna 'inega ona 'ewea.

^{5 e} Omi'a kilakai tomtau 'eva'evaledi ona 'amayabedi ta ona matayagedi. Ta qabumi ma emiavo ona veiuiula ilivu nuvana 'inega, mana Buki Nugwenugweina ena simana vonaya,

^b 4:18 Vos 11:31 ^c 5:2 Ion 21:15-17; Via 20:28 ^d 5:3 2Kol 1:24; Fil 3:17; Tai 2:7

^e 5:5 Vos 3:34; Efe 5:21; Iem 4:6

“Yaubada aiaqabu adi wawa
taudiega ia’uvaneqea nanogedi,
ta tomeqabu me edi nuawebui naveyolubedi.”

^{6f} Inega taumiega ona giwebuiemi ta ona awafelemi Yaubada nimana waiwai otaqina ‘ayanaya, ‘inega tauna ena tuta vevenua’ivinina ‘inaya nagivaneyemi. ^{7s} Ta emi nuavita qabudi Yaubada nimanaya ona a’uya be ‘inega na’ewa yavuledi, mana tauna ami To’itamaki aqiaqi.

^{8h} Omi’a me emi ‘iva’ava’ata ona toatoa, ta ona ‘itamakimi ami avia Seitani ‘inega. Mana tauna kavonaya yubai laioni sasasana muta’waya yabayaba ta salisali dadana nuanuana tomtau navunuqi na’ainia. ⁹ⁱ Emi vetumaqana ‘inega ona tovolu’i’ita ‘inega ami fata be Seitani ona nokea. Ta ona nuaia edavo weaqidi taudi bwa’obwa’o ana di’we qabudi ‘idia itoatoa. Taudi wese leisu ivetumaqanea ta vetumaqana~nana weaqina veilage be vita ilobelobedi. ¹⁰ Yaubada tauna veyoluba ‘iuna ni’au gabemi ena ‘abaga simasimatalina ta ‘eno’eno vatayana ‘inaya Keliso ‘inega. Ta emi veilage tuta kukusana ‘abibodanaya Yaubada nagiveaqiaqiemi be, navetovolo ‘i’ihimi ta wese nagivewaiwaiemi, e ‘inega avutugu ge ena nidoamo ‘inaya ona toatoa. ¹¹ Tauna ena waiwai ge ena awalamo, ta ‘esi ‘eno’eno vatayana. Vonahaqiaqi, eda nuanua ‘idewani.

Vona veyoluba

^{12j} Ya’a taida Sailasa ena iula ‘inega ba’e egu leta goyona ya’wayavia waiwai ‘imia. Yahalamaniana tauna ‘oloto togwavubiga ta aqiaqina. Egu leta ba’e ‘iuna be nuanuagu ona alamaniana Yaubada ena veyoluba ‘imia weaqina. Ta egu vona iula ba’e ‘inega ona alamani aqiaqiea veyoluba~nana tuta qabuna omi’a maega. Ge taha yani ana fata navetoasi’iemi veyoluba~nana ‘inega.

^{13k} Ta wese tovetumaqana qabudi ‘abaga ba’e Loma ‘inega edi vona veyoluba ‘imia. Taudi omi’a maega Yaubada ni’au venua’ivinemi. Ta wese natugu Maki ena vona veyoluba ‘imia. ¹⁴ Omi’a ‘aidega ‘aidega ma emiavo taumiega ona vona veyolubemi be ona lukaiwa venima sibutu ‘inega.

Ta nuanuagu omi’a Keliso ena tomtauyavo me emi nuadaumwala ona toatoa.

^f 5:6 Md 23:12; Lk 14:11; Iem 4:10 ^s 5:7 Md 6:25-30 ^h 5:8 1Te 5:6 ⁱ 5:9 Efe 6:11-13;
Iem 4:7 ^j 5:12 Via 15:22,37-40 ^k 5:13 2Tim 4:11; Via 12:2,25; 13:13